

四庫全書

集部

欽定四庫全書

集部

明詩綜卷四十七

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官主事臣陳壩

謄錄監生臣李克文

欽定四庫全書

明詩綜卷四十七

翰林院檢討朱彝尊編

孫陞二首

陞字志高餘姚人嘉靖乙未賜進士第二授翰林編修歷右春坊右中允國子祭酒陞禮部侍郎改吏部復改禮部旋又復吏部進南京禮部尚書卒贈太子少保謚文恪有集

穆敬甫云孫詩爾雅足稱

上乘

送龍氏

客子欲何之
蒼梧古南粵
相望萬里餘
征鴻杳天末
杪秋霜露零
寒飈迅城闕
睠茲發深慨
而況當乖別
采蘭以贈君
所願芳未歇

送陳氏之留都

結交不在早
要在心所當
伊人則古昔
晤輒情何長
云胡倏行游
告言之建康
驅車薊北門
鼓枻潞河陽
川原

悠以邈使我戚中腸自戚還自慰睽離庸詎傷黃鵠摩
青霄遠舉固其常去矣勿復道恒德期不忘

趙貞吉 一首

貞吉字孟靜內江人嘉靖乙未進士選庶吉士
累官禮部尚書入直文淵閣加太子太保卒贈
少保謚文肅有集

金陵送取經僧回蜀

洗鉢長干寺鳴榔一葦灣經收唐藏譯歌學楚狂還草

綠金沙島雲開石鏡山慈航偏易渡豈若世途艱

林廷機一首

廷機字利仁閩縣人嘉靖乙未進士改庶吉士

除檢討遷國子司業出為南祭酒遷太常寺卿

陞工部侍郎改禮部進工部尚書復改禮部贈

太子太保諡文僖有世翰堂橐

王元美云利仁如太湖中碩石

非不具體
無乃癡重

九日琅琊山宴集

此日琅琊亦勝遊
眼中風物足清幽
青山似識重來客
白髮能禁幾度秋
萬事無如行處樂
一尊還爲故人留
登臨况復逢佳節
會取黃花插滿頭

何維柏一首

維柏字喬仲南海人嘉靖乙未進士改庶吉士
授監察御史坐劾嚴嵩廷杖累官南京禮部尚

書謚端恪有天山草堂存藁

顏應雷云先生詩
冲澹雍雅趣味天

然

靜志居詩話端恪詩多雜講學語合格者希其
乞休作云樂事尚饒新歲月勝游不改舊雲山
侍其父與鄉人為
九老會亦佳話也

夜坐

虛亭面芳沼涼月散遙林坐觀羣動息惟聞蟋蟀吟物
性各自適茲理會予心虛明生夜景微風開我襟整衣
起巡簷鳴我花間琴緬懷千載下希聆疏越音高梧發
孤籟妙契天機深對此不能寐待旦夙所歆

尹臺二首

臺字崇基永新人嘉靖乙未進士選庶吉士授
編修歷修撰諭德侍講遷南國子祭酒調北祭
酒改少詹事兼侍讀學士陞南吏部侍郎進南
禮部尚書有洞山集

送西吳張太史使江藩

京國論交幾過從郊筵惜別奈殘冬衝寒裘馬今朝發
獻歲鶯花若處逢桐葉剪圭周建爵菁茅立社漢分封
歸將錦節停鄉邑玉筍高開紫霧重

光山逢劉唐巖副使

十年芳草惜離羣
海上朱旂隱暮雲
何意歸舟停楚澤
萬山黃葉獨逢君

康太和

三首

太和字原中莆田人嘉靖乙未進士改庶吉士
累官南京工部尚書有礪峰集

人日

南國逢人日相傳卜歲華
陰晴曾不定時序轉堪嗟
地

僻將舒柳山寒未放花草堂詩欲寄羈思正無涯

端午書懷

入夜潮聲急平明江霧開感時人競渡弔古獨登臺野
樹疑分合沙鷗任去來乾坤堪一笑駛景白駒催

仲秋國學陪祀

吾道宮牆在清秋雨露多禮分三獻肅樂奏九成和夜
靜傳金柝庭虛聽玉珂歸途燈火遠星斗耿天河

張舜臣一首

舜臣章邱人嘉靖乙未進士累官戶部尚書都察院左都御史卒贈太子少保

雲中曲

黃雲塞北起秋風宣府居庸羽檄同天子臨朝親遣帥
戰袍賜出大明宮

孫植一首

植字斯立平湖人嘉靖乙未進士除南京刑部主事累官刑部尚書謚簡肅

詩話簡肅家誠頗嚴諸子析箸後命每夕各出
盤蔬榼酒共飲飲必分題賦詩其意以為兄弟
日親則妻妾之言不得而問蓋亦具苦心矣公
之先名固者元處士有詩名聽雪齋集嘉隆間
曾鏤板惜也今其
子姓莫有儲藏者

霜降陵祀夜行

夜靜鐘聲徹山深古柏寒回風吹落葉絕壑響鳴湍候
騎林間出懸燈嶺外看神遊列聖遠弓劍五雲端

張

瀚

五首

瀚字子文仁和人嘉靖乙未進士累官太子少

保吏部尚書贈太子太保諡恭懿有奚囊蠹餘

雜詩 二首

王胥習格熊黃公善厭虎血氣一時衰終為黠獸苦安
身貴明哲驚猛奚足數魯縞本非堅猶能敵强弩知雄
守其雌深藏是良賈

復蛸生枯株脫殼爲元蟬本與槁壤俱一朝憑化遷吐
納月露中拂沐風雨前微形竊伏匿何意聲日宣螳螂
枉見撲稟質非甘鮮

初夏入濟

我昔駕征航芳華媚初景淺綠曳垂楊輕紅發朱杏忽
焉幾千里始涉齊魯境春風度去陌夏雲薄前嶺花落
樹陰繁鶯鳴晝逾永戀土厭薄遊懷人復心耿天闕五
雲中蓬窗日延頸

歸鶴篇

皎皎雲間鶴不受氛塵侵幽人一以贈馴爲階下禽春
風舞翩翩秋月唳清音經年託儔侶欲別意難任念非

夙所隨還歸嘉樹陰客既眷故鄉鳥亦適故林去矣物
無累懷哉誼已深願比雲霄翼常同萬里心

出塞

涇原北望塞門秋漠漠沙塵暗戍樓羽檄不來羶帳遠
前軍夜獵海西頭

馬森一首

森字孔養懷安人嘉靖乙未進士累官太子少
保兵部尚書諡恭敏有鍾陽集

分水關

出關陞土盡征路楚山迎曉霧連空暗炎天過雨清人
來千樹杪鳥雜百泉聲每憶復與闊難從石罅行

靳學顏二首

學顏字子愚濟寧人嘉靖乙未進士除南陽推
官累遷吉安知府歷左布政使入爲光祿太僕
卿以副都御史撫山西轉工部侍郎改吏部有

兩城集

朱中立云子愚詩宗初
唐雄渾老健卓然成家

出塞

大漠羽書傳君王勅視邊徵兵動河朔伐鼓下祁連鐵
騎金沙冷雕弓寶月懸由來重恩紀不爲勒燕然

即事

片片輕鷗淥水涯隔溪楊柳是誰家主人有酒不招客
可惜滿林紅杏花

陳堯一首

堯字敬甫南直隸通州人嘉靖乙未進士歷官

刑部左侍郎有梧岡詩集

夏日後樂園雜興

吏隱容疎放園居况寂寥
護花編架密種豆引泉遙
閱世思緘口逢人恥折腰
無能煉丹鼎華髮日蕭蕭

康朗一首

朗字用晦惠安人嘉靖乙未進士歷官右副都御史巡撫貴州

昌平道中

塵俗每相拘日夕不遑息暫輟簿書勞山間事行役驅
車出北郊晴煙委園陌松梢露漸稀草際霜已白初與
市塵違忽見山如積明月含半峰流水時滴瀝良似故
山中眷言素所適游子未能歸懷哉安可獲

許穀八首

穀字仲貽上元人嘉靖乙未進士除戶部主事
改禮部轉吏部郎中遷南太常少卿謫浙江運
副起爲江西提學僉事陞南尚寶卿有外臺武

林省中歸田諸橐

穆敬甫云許公家建業自能爲六朝語

詩話石城詩頗近大厯十子

新秋飲秋澗宅分韻得我字

輕颺送驕陽嘉節屆流火故人敞層軒芳筵列瓜果野
老纔登堂良朋漸盈坐展卷道古今泯迹忘爾我赤日
既西暉涼月生樹左高天飛白雲歷亂不成朵遷席向
廣庭縱橫樂皆可既醉乃言旋竟忘白幘墮揮毫贈同
心志合會終安毋然逐輕肥令人笑委瑣

畫鹿行

古來寫鹿誰最賢耶律以後皆無傳吾鄉近推快園叟
毫端物態俱天然快園野叟氣豪蕩此圖全得山林象
疑從靈囿翻然來走入君家錦堂上元圃平開藥草生
靈泉倒瀉溪流清溪邊跂跂似求侶草畔蛭蛭如有聲
野叟風流不可見綵筆貽君足珍玩霜毫豈羨芙蓉園
銅牌未數宜春苑憐君自是全生者百年意興惟原野
世路逃名不受羈雲厓結伴寧相捨予本江南一散人

悔將書劍誤風塵披圖便欲捐簪珮共採苹蒿樂性真
偶成

新作魚鹽吏遙辭龍虎都乾坤無棄物江漢有潛夫短
笠三山雨扁舟八月鱸茲懷何日遂把酒意踟躕

夏日過西宗別院

退食尚書省聯鑣大士林地開仙梵境客遠市塵心石
竹下空翠山雷生晝陰竭來幽賞意一寄白雲岑

送馬抑之冊封魯藩

惇族開新典，馳封輟從官。
使星過即墨，廐馬出長安。
日躍扶桑樹，芝生泰嶽壇。
勝游多賦草，揮贈故人看。

過德州

樓船御北風，渺渺過齊東。
種秫生涯薄，誅茅結構同。
日沈平野上，人語近村中。
水面看牛斗，星槎似可通。

雪

吳山冬盡雪初飛，極浦彤雲合翠微。
越女臺邊猶黯淡，蘇公隄上已芳菲。
他鄉酒盞愁仍把，虛室琴書淨可依。

所願普天歌樂歲故園休問幾時歸

登五雲山

名山高擁五雲層危磴重重躡屐登西望諸天應咫尺
東來疊嶂總丘陵海門遙指三山樹梵殿常懸七寶燈
便掃蒼苔題短句乾坤高覽記吾曾

王維楨二首

維楨字允寧華州人嘉靖乙未進士選庶吉士
授檢討歷修撰諭德陞南京國子祭酒以省母

歸值地震陷死有槐野存笥集

孫志高云槐野詩宗少陵多深

沈之思務引於繩墨必結構中度而後出之王元美云王允寧如馬服子陳師自作奇正不得兵法又如項王嘔嘔未了忽發喑鳴穆敬甫云王詩負氣不世沈鬱有調大是少陵之遺俞汝成云槐野詩磊塊澆濟雖非純雅之辭不失雄渾之氣胡元瑞云嘉靖時為杜者王允寧孫仲可為六朝者黃勉之張愈光允寧于文矯健勉之於學博洽皆勝其詩若李舒章云允寧意氣猶可若云學杜尚未有毫分

詩話王允寧孫仲可皆學杜而不得其門允寧自謂七律然尤懦鈍五言有句無篇如千里秋江水孤舟月夜吟高林風葉下遠渚薄雲低花樹迷官路濤聲入縣門山無雲斷處塔有雁來

時三疊尊前酒雙旌畫裏身暮雲迷遠岫春棹
響空江天險分秦塞神謀度漢兵尚冷然可誦
也允寧死於地震謗者謂獲罪華山之神致同
時死者尚有楊尚書守禮楊都御史邦奇馬光
祿卿理李伯華詩所云平生三老友一夜委泥
沙也諸公豈皆獲罪於神者邪事在嘉靖二十
四年十二月十二日夜蒲州震尤甚山陰僖順
王聰耐亦薨又輔國將軍四人承國將軍一人
鎮國中尉十七人輔國中尉三人庶人五人縣
主郡君淑人各一人夫人四人齊厭死伯華詩
又云四方多變異詎止平陽哀戶曹候降火渭
流却逆洄山崩魚泉湧彗見復風霾犬育在雞
卵蛇出由人懷雨豆血淋漓妖鳥羽毳毼虎產
於猪腹人生自蠶胎李樹忽結瓜多而更且魁
夜見火城出蓮從上釜開妖孽如此天心可知
而西苑君臣方以丹鼎青詞相尚祇見白龜白

鹿頌瑞應者紛紛真可長太息也伯華詩太猶
鄙以其紀事特詳故附錄以資史局述五行志
者

孝烈皇后挽歌

範內留芳訓扶天有駿功仙游知跨鳳聖念為當熊玉
珮虛無裏蒼雲悵望中宜春花照眼淚灑舊時叢

詩話宮婢楊金英欲斃世宗于熟寢以繩束帝
喉未絕有張金蓮走告皇后往救獲甦此嘉靖
壬寅年事也訊得同謀者楊玉香邢翠蓮姚淑
翠楊翠英閻梅秀劉妙蓮陳菊花王秀蘭徐秋
花鄧金香張春景黃玉蓮凡一十三人悉磔之
于市王祭酒維禎孝烈方皇后挽歌仙游知跨

鳳聖念為當
熊蓋指此也

熱

院深風不度火鑠井猶溫
林密翻已暑蚊多故趁昏
何方無五月明發問孤村
蓮洞涼如許茶瓜與客論

駱文盛 二首

文盛字質甫武康人嘉靖乙未進士選庶吉士

授編修有兩谿集

蔡子木云兩谿詩冲澹爾雅
出孟貞曜之上 孫志高云

質甫詩婉切冲
雅似唐人聲調

讀延生集

適俗韻自少愛山情頗多邇來南山下卜築當巖阿檻
外倚修竹牆頭纏女蘿藹藹叢桂陰鬱鬱喬松柯清泉
日夕流好鳥鳴相和展書坐磐石書中意如何延齡與
養性要在蠲煩苛長生豈敢慕庶以痊沈疴

左順門值雨

曉漏趨朝候殷雷送雨時殿雲低拂檻檐溜急通池自
訝沾衣速何妨退食遲宮鶯春罷轉應濕上林枝

王立道一首

立道字懋中無錫人嘉靖乙未進士選庶吉士
授編修有具茨集

送沈夷齋

飛來雲中雁十五自成行如何同心友各往天一方憶
與君相見桃李熙春陽胡然忽離跡飛蓬卷秋霜天時
有代謝人事安可常不見參與辰出沒遙相望雖有盈
尊酒何能解中腸

劉繪二首

繪字子素一字少質光州人嘉靖乙未進士授

行人選戶科給事中轉刑科右給事中出知重

慶府有嵩陽春詠

皇甫子循云先生經術文章可謂魚之若騷賦詩歌則固

北海餘聲宣城寄

興非所專好也

詩話潘恭定試士中州得子素卷曰此河岳英
靈也子素既釋褐給事省中偕同官壽貴溪貴
溪手玉盃行酒子素揮之次日疏其十罪不報
明年六月朔日食晝晦永陵大恐問天官主何
占子素請去言以塞天怒言遂去位子素亦出
守及言再相嗾南省論罷其大指謂飲酒酣歌

自稱豪俠當場蹴踘旁若無人廣聚生徒而要譽多張讌會以恣淫既歸田講范白之術取負郭水田疏為大壑種魚萬頭牧馬山莊得良駒六十匹又責僮往來徐揚貨布及鹽課入息以給賓客其答揚用修書云人情有所寄則有所忘寄而意不縱則忘之不遠惟忘之遠而後我無所貪無所貪而後能適蓋亦自道也與熊叔仁論文云仙釋二氏非聖之書吾既不從其道却借彼之言以資吾文所謂文者將何所為乎為文而雜以二氏語此唐宋間雜學之弊也昌黎不道二氏語與二氏言必舉六經之言告之子厚謂某秀才文多引莊列頗奪正氣論亦凜凜至與二氏言便盛稱其教而雜諸戒律毗尼之說却不自覺蘇氏記大悲勝相諸作至為偈語準楞嚴法華大不宜也其持論甚正詩非所長比于伯華稍事剪裁

曉望終南

終南亦何有白雲長英英層峰亘西來巍然臨咸京中
有太一洞窈窕清籟生鬱鬱古柏疎闕闕春鳥鳴紅泉
石乳溜金竈丹光縈經年鮮人跡翠竇懸空青我欲往
從之坎壈不能行緇塵滿周道踣躅傷我情何能奮飛
去脩然學長生

送吳祥雲赴趙總戎幕

天門昨夜耀龍文大將橫戈正立勲上谷不傳青海箭

漁陽新練水犀軍金笳夜嘯樓前月赤幟朝翻陣外雲
遠客莫辭千里去滿堂珠履盡迎君

薛應旂一首

應旂字仲常武進人嘉靖乙未進士除慈溪知
縣轉南吏部主事歷浙江提學副使改陝西有

方山集

詩話方山以帖括擅長既負時名遂專著述所
續通鑑孤陋寡聞如王偁李燾楊仲良徐夢莘
劉時舉彭百川李心傳葉紹翁陳均徐自明諸
家之書多未寓目并遼金二史亦削而不書惟

道學宗派特詳爾憲章錄一編似未覩實錄而
成者若浙江通志簡畧太甚俾後之欲知前事
者漫無考稽文獻不足徵是誰之過與昔劉仲
原父謂可惜歐九不讀書覽方山遺編頗同此
恨詩其餘藝
不必論也

贈朱子价

美人淮南來貽我瓊瑤篇扣之作哀玉引被清商絃忽
復渡江去揚帆凌紫煙臨風愴然別佇立還自憐况當
三五夕皓月生嬋娟盈盈媚河漢對影成留連豈無新
相知故舊情獨牽折葵製團扇置子懷袖間采蘭結芳

佩繫子衣帶邊如彼遠行邁勿爲中路捐

陳鳳四首

鳳字羽伯號玉泉上元人嘉靖乙未進士累官

陝西參議有清華堂擇存

王元美云陳羽伯如東市倡慕青樓價微

傳粉澤絕
工顰笑

始至郡

予本澹蕩人十年滯空谷偶逢純熙運釋擔荷甄錄浮
沉金馬門日飽太倉粟恭承紫宸詔持法佐明牧此邦

古帝丘在昔號淳樸所嗟末世僞浮雲恣反覆秋荼網
何密棘林夜多哭折獄媿惟良受命如集木雖乏淑問
資尚希士師躅願同于公仁無取高門福庶獄惟庶慎
仰裨刑措俗嘉禽庭可巢幽園草生綠矢心及茲辰詠
言聊自告

贈別孫子請告還山

丈夫各有志所志在千秋臨岐送將歸解贈雙吳鉤子
有高世才行矣善自謀盛年易就衰去日安可留努力

萬里途及時須好修肯戀京洛塵以貽靜者羞

行經李膺墓

炎精黯無光吹噓賴君子三君世所宗吾愛司隸氏大
厦業將傾一木支未已昊天不祚漢人亡國隨圯偶茲
行役餘幸覩豐碑峙荆榛莽交道荒丘竟誰是龍門徒
想像仙舟渺云逝石麟既埋沒原隰自虧蔽我懷若而
人九原嗟莫起驅車行灑泣落日照寒水

再送環浦憲使

攬轡喜重臨臺端遂盡簪離亭忽此別客思一何深雨
雪燕山道江湖魏闕心知君多古調三歎憶遺音

周天佐 一首

天佐字宇弼晉江人嘉靖乙未進士除戶部主
事上疏救楊爵廷杖卒萬厯中追贈光祿寺少
卿天啓初追諡忠愍有績山存橐

過田家

五月過田父刈麥方暮歸徵租公府吏督責詣荆扉舍

擔具難黍向吏語依依非敢後官稅去秋穡事微晚場
穫無穀婦織不上機此月幸有麥欲救眼前飢送吏行
出門歎息淚滿衣千村多飽吏不見一農肥

牛 恒 二首

恒武功人嘉靖乙未進士仕至周藩左長史

周藩宮詞 二首

蕭蕭修竹映池寒分汲銀鉶灌牡丹報道花朝開內宴
競持金剪繞朱闌

夜來行樂鴈池頭侍女分行秉燭遊
唱徹憲王新樂府
不知明月下樊樓

陳元珂一首

元珂字仲聲閩清人嘉靖乙未進士有雙山集
新構一笑亭于烏石山陰漫述

曾聞劉隨州英采特高妙解印無與言見山始一笑
伊余慙古人拂衣幸同調結屋傍山陰開軒面層嶠庭草
愜幽懷巖雲增遠眺況有同心人銜杯縱吟嘯翠篠逗

曉風薜蘿收夕照散地有餘歡閉門忘津要悠悠百年
身此意知誰肖

張天麟一首

天麟深州人嘉靖乙未進士

旌德道中

小邑無郵吏農人半甲兵石樓橫斷岸草徑入荒城聞
道甘泉駕將臨細柳營風塵何日靜洗眼看昇平

吳瓊三首

瓊字邦珍婺源人嘉靖乙未進士

送方際明之金陵

津亭楊柳色話別思如何爾向金陵去應聽玉樹歌石
城寒雨散牛首暮雲多好獻匡時策無須念薜蘿

旅邸除夕

老至謀仍拙天寒酒易消冰霜愁裏過鄉國夢中遙一
歲祗今夜百年能幾宵病懷堪自適無復歎蕭條

歲暮書事

海上猶多壘江東未息兵如何觀察使遽報武功成寒
沍凝春令陰霾蔽日明不堪黃浦路雞犬寂無聲

施

峻

三首

峻字平叔歸安人嘉靖乙未進士除南京刑部

主事歷郎中出知青州府有漣川集

王元美云施平叔如

小邑民築室器物猶完徐伯臣云平叔詩隨時上下而格調渾厚體裁平實固一代之良

茅順甫云施青州詩音響興寄與荆川相上下

詩話平叔以七律自詡問黨文稱焉然殊不見好諸體過修邊幅未免氣餒顧若漢序之謂唐

以後詩音調格律相尚鍛鍊益
工其氣益弱毋乃微辭也乎

撒秧謠

東阡有田三十畝秧穀已撒十五斗去年薄收難接新
種得早稻方救貧相傳今年晚更好十分祗宜一分早
東鄰西舍皆晚禾我種早稻知如何

郊扉

青入秧田雨黃連麥坂雲郊扉聊騁望世事不須聞竹
外鳩雙語花前鶴自羣溪邊來縣尉載酒勸農耘

寄王屋張山人元超

隱隱茅堂鎖白雲
萬峰飛瀑靜中聞
徵君只在東西崦
碧樹叢深路不分

郭萬程 一首

萬程字子長
閩清人
嘉靖己未進士
刑部主事
有雲橋集

仗劍

仗劍遊薊門
蹉跎歲華晏
中懷日鬱紆
結髮從遊宦
一

謝鹿豕羣誤蒙犬馬恭宮殿生潯雷浮雲在清漢徒有
憂天心無從隕首諫退而礙祿養進則涉誹訕悔作章
句儒書空徒浩歎忠義本區區焉敢私憂患耿耿平生
心何由愬親串

茅
瓚一首

瓚字邦獻錢塘人嘉靖戊戌賜進士第一累官太子
賓客吏部左侍郎兼翰林院學士有見滄先生集

寄王冉山

清商涼氣肅白露瘁庭柯美人去極浦一夕秋風多言
念燕婉情攜手南山阿為樂苦不周良游忽蹉跎瞻彼
松柏枝引蔓附女蘿而我同心侶悵別情如何

袁煒一首

煒字懋中慈溪人嘉靖戊戌賜進士第三授翰林
編修歷侍講學士禮部右侍郎進尚書召入
直改戶部加少傅兼太子太傅建極殿大學士
卒贈少師諡文榮有元峰集

王元馭云公詩華
富溫密無棘塞詭

衆之

詞

詩話永陵自壬寅宮婢之變即移寓西苑萬壽宮不復居大內先是嘉靖二年四月太監崔文等於欽安殿修設齋供請駕拜奏青詞此金錄青詞之萌芽也其後齋醮日盛一時詞臣以青詞受寵眷者甚衆而最稱旨者莫若袁文榮煒董尚書份如世所傳醮壇對聯云洛水元龜初獻瑞陽數九陰數九九九八十一數數原于道道通元始天尊一誠有感岐山威鳳兩呈祥雄聲六雌聲六六三十六聲聲聞于天生嘉靖皇帝萬壽無疆此則文榮所撰也時禁中有貓微青色惟雙眉瑩潔名曰霜眉善伺帝意帝甚憐愛之貓死命以金棺葬萬歲山薦以齋醮文榮撰詞有化獅為龍語因題碑曰虬龍冢云王秀才逢年上文榮書曰閣下以時文發甲科

以青詞位輔相安知世有所謂古文者哉快意之言然未免直而無禮矣

初夏宴崔太常道院

出郭尋元圃黃鸝懷好音瑤壇羣木秀清磬碧雲深綠酒傾燕市微風動越吟歸來躡明月萬戶漏沉沉

翁大立 三首

大立字儒叅餘姚人嘉靖戊戌進士累官南京兵部尚書

吳謳 三首

蠢茲田中氓輸稅入城府上逢官長嗔下遭卒胥侮但
保微軀完寧論錢如土官輸曾幾何羨餘反無數錙銖
苟未償猶然禁囹圄待得還鄉問敝廬無完堵

舊徵未云已府帖重徵新昨朝銀花布今日金花銀侵
晨趨城府薄暮徧鄉鄰一身應重役重役無寧晨父母
生我時胡不百我身殘軀被華楚苦切難具陳寧爲乞
市子莫作當官人

鄉民不出鄉何曾識京輔官家督輓輸僉丁作溫戶給

文督儲臺登數度支部盈虧日較籌未敢捐區釜中途
忽邁患漂沒河淮許經年未能償逢人涕如雨人憐征
戍勞誰憐輓輸苦

陳紹儒一首

紹儒字師孔南海人嘉靖戊戌進士累官南京
工部尚書有司空集

送吳中丞悟齋巡江

青霄繡斧出郊行春水樓船壓浪平聖朝王會自江左

才子風流今舊京城隅黃柳色轉變湖上碧桃花欲明
正好芳辰無那別勞勞亭畔不勝情

喻時一首

時字中甫光州人嘉靖戊戌進士累官南京戶

部右侍郎有吳臯海上老人二集

安如山云吳臯詩格律宏

雅思出象外李時遠云海上老人詩
思苦澀好用僻事及佛書多斧鑿痕

村舍

塵斷蒼波繞村遙碧嶂臨晴沙隨豕跡風葉送禽音誰

笑兔園冊獨憐鷗社吟四時真賞在幽事動關心

章

煥 三首

煥字懋實吳縣人嘉靖戊戌進士除禮部主事
歷吏部考功郎中轉南京太僕少卿進光祿卿
以右僉都御史撫治鄖陽改河南巡撫尋以右
副都御史總督漕運改督南京糧儲坐誣逮繫
遣戍自稱羅浮山人有陽華漫橐

醉翁亭漫題

醉翁昔醉醉翁亭翁醉還看翁自醒我來亭中翁已去
釀泉之水空泠泠相邀明月坐白石舉首青天橫翠屏
眼前有酒不能酌相逢一笑花冥冥

聞寇至吳門焚劫登樓作

江上黃塵慘不開吳門不見使人哀虛聞青海無傳箭
始信昆池有劫灰忝竊自慚稱吏隱故園何日賦歸來
傷心野哭千家處愁倚滁南百尺臺

南巖宮

三十六巖何者奇南巖巖壑多幽姿飛空欲作翔鸞舞
跨澗真看渴虎垂樹杪迴欄時隱見雲中棧閣故參差
歸旌欲問來時路洞口雲深已不知

萬虞愷 二首

虞愷字懋卿南昌人嘉靖戊戌進士除無錫知
縣徵爲南兵科給事中累遷山東參議福建副
使貴州叅政福建右布政使山西左布政使擢
南京都察院右副都御史入爲刑部侍郎有楓

潭詩鈔

山中曉行

攬衣中夜起秣馬早鳴鞭殘月不照地明星猶在天出門頻問曉歷澗暗聞泉翳翳東林外山雲雜隴煙

烏江廟

入關事已定豈在割鴻溝霸業一朝盡烏江萬古流

周怡一首

怡字順之寧國太平人嘉靖戊戌進士除順德

府推官擢吏科給事中
以言事受杖繫獄久得
釋隆慶初起遷太常少卿
及卒鄉人私謚莊簡
先生天啟初追謚恭節
有訥齋集

詩話訥齋封事因翟巖二輔臣市恩修怨而發
疏中有云陛下日事禱祀而四方之水旱災傷
未能消也歲開納銀之例而府庫未能充也歲
頒蠲租之令而百姓未能足也時下選將練士
之命而邊境未能寧也深觸永陵之怒廷杖之
下錦衣獄踰年乃釋既而與楊爵劉魁仍逮繫
所著訥齋集大半獄
中與爵等倡和作也

知二弟至用韻慰之

歲晚吾長滯秋深爾遠來鵲鴿飛已急鴻雁去還哀伯
氏喜猶在爾懷強自開可憐風雨夜須酌解愁杯

王

健

七首

健字偉純永嘉人嘉靖戊戌進士歷官光祿少
卿有鶴泉集

過馮公嶺

飄飄谷雲飛泠泠澗水流水雲亦何心旦夕使我愁憶
昔離鄉縣迨今逾二秋形容日以變光景去不留墨翟

非咸英楚王惡卞璆主恩不時遇志士徒色羞井渫豈
不食受福明王求攘袖啓篋笥攬取雙吳鉤

贈江臯陳子

日月互代謝火旻忽西馳荃蘭秘幽谷芬馨誰復知矯
矯江臯彥文彩未彰施鳳凰棲庭梧鵬鳥運天池機哉
不可度神物固有時君其抱明志終始以自持

上陵

玉帛來天府衣冠去國門萬年周典禮七葉漢陵園月

擁元宮迴星依紫極尊翠華如在上瞻切五雲屯

送友

良晨餞我友長鋏歸去來請歌青玉案贈別黃金臺一
鳥日邊下片帆天際開知君意不適行矣首重回

別建安尹陳石陽

王粲忽不樂陳琳將遠行三秋離別思十載結交情日
下飛鳬影雲中去雁聲有懷他夜月夢繞建安城

懺閣阻雨

危崖側轉路千重，懺閣登臨坐午鐘。
可是潭龍來聽法，半山香雨忽濛濛。

題湖南處士卷

湖南結屋水雲間，十里平湖抱岸還。
日落沙明開玉鏡，芙蓉倒浸郭公山。

張東壺一首

東壺字國鎮，莆田人。嘉靖戊戌進士，歷官太僕。

少卿

過楊文敏公塋

豐樂橋前擁紫雲
路人指視太師墳
不為子姓干恩澤
力與鄉邦寢運軍
國有三楊
翊社稷
門無一字表元勳
高賢去矣餘封土
落葉蕭蕭日近曛

溫新三首

新字伯明洛陽人嘉靖戊戌進士官主事有大

谷集

宿靈寶

驛館桃林在山城木葉秋我行聊駐馬訪古憶歸牛風
浪黃河近塵沙白日愁鄰家好明月今夕自高樓

白溝河先世武功所在感而賦焉

朝行清苑市暮渡白溝河此地煙塵渺先人戰伐多野
猶存大樹世已罷橫戈涉水思鴻烈臨風發慨歌

野菊

重陽不見鄉園菊野徑折來尤可憐為客正當嶺海外
逢花偏憶酒杯前荒英斷葉愁相把落日飛雲恨轉牽

兩歲佳辰俱自負幾回欲賦不成篇

沈 鍊 二首

鍊字純甫一字子剛會稽人嘉靖戊戌進士除
漂陽知縣調往平再知清豐入為錦衣衛經歷
坐劾嚴嵩廷杖謫田保安州尋為嵩所陷僇于

邊隆慶初贈光祿寺少卿諡忠愍有鳴劍集

元王

美云青霞詩甚奇麗而不能盡削其牢騷憤激
之氣故往往多楚聲 陳卧子云青霞快男子

詩亦
俊爽

寄諸生楊子中

碧柳青莎怨暮春沙明水白更傷神
娟娟夜月當樓靜冉冉飛花入座頻
海畔音書常阻絕山城瘦馬苦逡巡
坐憐物色多惆悵欲覓芳洲彩句新

答陳鳴野社友

十年赤縣頻為吏一疏中朝便落官
勞寄音書如夢寐細籌世路轉艱難
馬蹄最識邊沙苦鴈影猶驚塞月寒
詞客幸能憐旅況玉門應為賦生還

茅坤一首

坤字順甫歸安人嘉靖戊戌進士除青陽知縣
以憂歸補丹徒知縣徵授禮部主事改吏部左
遷廣平通判陞南京兵部主事出為廣西按察
僉事歷副使有白華樓玉芝山房老年諸橐

詩話世傳唐宋八大家之目係鹿門茅氏所定
非也臨海朱伯賢定之於前矣彼云六家者合
三蘇為一耳今文抄本大約出于王道思唐應
德所甄錄茅氏饒於貲遂開雕以行即其評語
稱闕忠義為闕壽亭不亦刺謬甚與文既卑卑
詩亦庸鈍觀其酬酢多醫卜星相之流知非意

所存
也

春日躡雪彭城道中

春日獨傷春事稀
馬蹄又向雪中歸
數家煙火望欲斷
幾樹飢禽寒不飛
有客尋詩穿谷口
無人載酒欵林扉
看山不覺日已暮
千里雲霏生薜衣

莫如忠 一首

如忠字子良松江華亭人嘉靖戊戌進士除南京工部主事改禮部擢貴州提學副使投劾歸

補湖廣副使歷河南參政陝西按察使浙江布

政使有崇蘭館集

陸與吉云中江抒寫性情諧合風雅五七言近體可以上

方王孟抗行岑劉物數腹雋永

陳卧子云方伯名德羽儀詩頗

易朴

送王汝修楊翼少二給諫募兵河南山東

皇明盛文軌武偃不復張雲中一失險殲騎遂縱橫甘
泉照烽火穹廬薄城隍登陴半市傭格虎驅羣羊養兵
百年來國恩竟誰償天子赫震怒徵發無留良王生按

臨淄楊子泣大梁千金募勇士桓桓奮鷹揚丈夫四方志
狗國在邊疆無專職青瑣搥腕談慨慷

喬世寧 九首

世寧字景叔耀州人嘉靖戊戌進士繇南京刑部郎中遷四川按察僉事歷湖廣提學副使河

南參政終四川按察使有丘隅集

王元美云喬景叔如清泉

放溜新月掛樹然此景殊少不耐縱觀
舒云景叔趣本爾雅調亦清和規模沈宋時沿
李白孫山甫云三石子詩不作唐以後語盡
洗剽敝繁陋之習一裁於造化性情之真傳也

必遠

詩話何仲默視學秦中景叔親受詩法譚必移
日故其詩整而不浮可與許少華肩並餘蔑有
過焉者

燕歌行

西日不再中東流無迴波人生如夢寐少壯能幾何朝
馳長安道暮送歸山阿胡不置酒高堂鼓瑟日以歌君
王萬歲罷干戈霍家衛家相經過千金駿馬換吳娥今
者不樂來日無多黃金白髮奈君何

鴻鴈行

鴻雁何聯翩聯翩西北翔西北曠何許逝將之塞疆我
有一書札緘之金玉箱將以遺所思道路阻且長因風
託羽翼為爾立徬徨去時春草青歸當秋草黃草黃歲
將晚毛羽恐摧傷願言愛毛羽邊塞多風霜

長安道

長安道直以迂環五城開九衢外羅天市拱皇居中懸
日月耀金樞朱輪驄馬如流水長安道上禁馳驅誰家

少年俠邪徒豪雄去天尺五餘白日殺人當路衢司隸
過不問况乃執金吾人言輦轂之下朝犯法暮伏誅吁
嗟此徒天日無霍家奴衛家奴

竹杖歎

我病常持一竹杖出門入門全爾仗病愈却之曾幾時
不復念爾能扶持我心視汝無好惡祇緣衰健情亦移
何況世情雲雨變妍媸翻覆須臾見寶劍棄擲康瓠留
得時即貴失時賤新人入門故人出秋風那復悲紈扇

鳥盡弓藏自古然竹杖竹杖何足歎

入塞

沙海烽塵息將軍奏凱旋九邊傳露布一夜到甘泉
天子開麟閣都人望馬鞭定知金市裏甲第在今年

秋夜

今夜燕城館忽驚霜露侵寒砧薄暮急落葉下庭深為
客仍多病悲秋正苦吟誰家明月下吹笛更關心

春鴈

春風纔幾日江鴈已春聲
關路何時返鄉愁爲爾生
望窮遙漢影不盡倚樓情
却憶金河北人同出塞行

聞河西警報

上郡連烽火河湟更羽書
一時傳警報中夜獨躊躇
歲苦兵戈擾身憐老病餘
名山猶未卜何處可閒居

馬湖登覽

四海車書日干旄萬里楊
牂牁今作郡魑魅舊爲鄉
江自金沙出山連玉嶠長
歲時常霧雨草樹只青蒼
舟楫

通吳楚梗楠足棟梁千秋賓上國一統見今皇到此真
殊域憑高覽大荒嵐光生澗壑雲氣滿衣裳西徼仍多
難當關詎可忘天王今有道舞羽為邊防

徐楚一首

楚字世望淳安人嘉靖戊戌進士除工部主事
歷官四川左叅政有吾谿集

築圃

垂老學為圃乘秋課築場
編筠聊覆屋疊石更圍牆
蔓

草艾宜盡嘉蔬刈可嘗親朋時一過漫說午橋莊

沈 啓 二首

啓字子由吳江人嘉靖戊戌進士歷官湖廣按察副使有西臺越吟楚吟家居雞窠諸橐

過越王祠

湘湖雲樹杪翼翼表宗祠殿古巖煙合苔深石磴危霸圖昭越絕教訓首西施尚想烏鳶曲君臣別淚滋

黔陽舟中

黔陽春草碧雲齊萬疊青山萬曲溪
久客不禁鄉土思
半牆殘月子規啼

王問八首

問字子裕無錫人嘉靖戊戌進士除戶部主事

歷郎中遷廣東按察僉事以父老請歸及卒門

人私謚曰文靜先生有仲山詩選祇役橐原筮

齋集崇文館橐

王敬美云子裕詩備然清遠
穆敬甫云仲山如姑射仙人吸

露餐霞都無
塵壒之氣

詩話仲山兼擅畫書詩畫多遊戲詩不起草五
言平衍者多歌行稍覺頓挫近體亦嫌率易越
鱗宣紙流徧人間披覽手書或與集中詩有異
由其才多下筆不能自休字句轉易皆於俄頃
也

贈友人

秋風吹衡宇絡緯已宵吟忽忽歲將暮誰不念所欽合
并嗟難久會合喜自今良辰且為樂胡不日鼓琴白駒
一朝去金玉懷爾音交義永不薄悠哉君子心

贈別沈少坡寅長

白門柳花覆大堤東風吹來逐馬蹄征車迢迢君解攜
故人猶在鍾陵西鍾陵江頭落日低爲君執鞭花下迷
憶君路傍春草齊到處交交黃鳥啼

采蓮曲貽施子羽

子羽爲海鹽丞不得志將告歸采蓮湖上故有
是贈

采蓮歸常日暮西江極望平所思在遙浦月滿蘭房未
有期風急湘川不得渡長干女兒不解愁羅裙結束盪

蓮舟始逐輕鷗過別浦還隨飛鷺向中洲
中洲別渚常相見向晚江風各分散獨惜流光歎落花芳菲易盡心
先斷

築城謠常熟縣作

築城入荒草白沙無煙莽浩浩築城上高山崩崖錯愕
青冥間我生不辰可奈何昔日防邊今備倭馮馮一杵
復一杵丁夫如雲汗如雨星火出門露下歸野田苗稀
黃雀飛今年縣官復徵稅城下相逢只垂淚

官軍來

白鶴鋪前沙日黃湖渚草長倭走藏
柘林舊賊驕不去
新舶正發南風狂寶帶橋西蛟起舞
白石山邊逐虓虎
湖南六郡多旌旗賊勢西來疾風雨
城頭戍鼓聲如雷
十城九城門不開到羊宰牛具宿酒
日夜祗望官軍來

團兵行

銷鑊鑠鑄刀兵佃家丁男縣有名
客兵貪悍不可制糾
集鄉勇團結營寧知縣官不愛惜
疾首相看畏占籍奔

命疲勞期會繁執戟操場有飢色星火軍符到里門結
束戎裝蚤出村將軍令嚴人命賤一身那論亡與存保
正同盟衛鄉里何期遠戍吳淞水極目沙塢白骨堆向
來盡是良家子

田家行

田家場圃築過畦大兒當家小兒嬉刈稻上場隱茆屋
黃日下檐雞啄粟人言畝收八斛餘官廩私租未及輸
樂歲家家猶自苦今日江南不如古

贈之山

之山家太倉州為園種竹歌咏自怡海寇至避
居金陵與予月夜步柳隄想念疇昔悽然傷懷
城柝聲悲夜未央江雲初散水風涼看君已是無家客
猶是逢人說故鄉

何御

六首

御字範之福清人嘉靖戊戌進士歷官浙江鹽
運使有白湖集

別何子

北風吹征襦與子重契闊
仰盼雙禽翔握手不能發
一似野中蓬一似弦上筈
朝望在河梁河水鳴活活
夕思隔河梁浮雲起天末
悠悠生別塗慎矣無飢渴

觀碧雲寺坐石泉邊酌酒

侵晨發廣源到寺日亭午
回見山下居頗異闌中土
樹底禽關關巖間鹿麇麇
鐘鳴出紺林香藹薄珠宇
薜荔當高垣薜蘿雜修楚
入門釋襟裾衆僧相導武
軒軒望

虛堂歷歷轉迴廡石泉山下行流杯坐中取
淙淙靜心源皎皎鑑神府即此慰遐情何戀
珪與組

青龍橋南遇山人汪旦

沿湖行欲竟前望青龍橋茅茨鬱煙火稍已鄰紛囂故
人歛相值雅見塵外標長揖立道左眷言相招邀山居
當甕麓轉岐路非遙松膏堪繼夜菰米足供朝畦蔬滴
露薤林果炊新蕉慷慨珍來意宛戀停予鑣野風吹秋
水征馬鳴蕭蕭願留竟莫克投贈媿瓊瑤

鄭林二君就北園

僻郡稍無事而多載酒臨雨消秋後瘴雲薄竹間陰紀
會賓朋寡看年鬢髮侵惟君數來往聊慰望鄉心

自東粵歸口號

嬾慢時將棄逢迎世所稱歸與從漢水去矣學於陵鶴
唳聞青野猿吟出紫藤君看山谷士未必盡無能

過慶原

野燒萋萋尚雨痕半山斜日近黃昏驛亭阻絕來時路

煙火蕭條戰後村，倦鳥驚人移浦樹。
寒潮帶月上江門，長年書劍催行色。
肉食慙孤報主恩。

俞憲一首

憲字汝成，無錫人。嘉靖戊戌進士，歷官湖廣按察使。有遼海金陵蓬萊轂下外臺去楚當奕諸集。

詩語汝成手輯，盛明百家詩足稱好事，而甄綜未當。舍彼蘭蕙，反存策苑。卷首題識，都不成文。
趙陵鋪

岸谷遷移不可憑空餘春樹曉煙凝年年芳草王孫路
走馬何人問趙陵

陸師道

一首

師道字子傳長洲人嘉靖戊戌進士官至尚寶
司少卿

晚過治平寺

修竹藏精舍香林遶化城窗中九峯秀門外五湖平綠
樹涼雲合丹楓夕照明祗緣山太靜易得感秋聲



明詩綜卷四十七